



Kamis, 19 Desember 2024
Ogen: Hakim-hakim 11: 4-11



Bela Negara



Adi enggo kita tading i luar negeri, enggo sukses usahanta i je, enggo ka kita erjabu i je, nggit denga nge kita mulih ku kutanta alu alasen 'bela negara?'

Jepta, enggo ipelawes senina-seninana i rumah bapana nari. Ituduh ia la anak bapana, sabap la bali nandena. Ipekitik seninana kal ia, alu ngataken pendahin nandena erlua-lua. Megelut kal Jepta erkiteken si e, ibedaken seninana kal ia erkiteken la sada nande. Lawes Jepta nadingken Gileat ku negeri Tob. I jah ia ringan. Ipepulungna kerina kalak si mampamampa, e maka ras ia ku japa pe. Tupung iserang bangsa Amon bangsa Israel, ilegi senina-seninana Jepta ku negeri Top. Ipindokenna gelah ras ia ngalaken bangsa Amon. Ituriken Jepta uga mbarenda ia ipelawes senina-seninana, gundari ia enggo jadi pemimpin i negeri Top. Tapi la e alasenna maka Jepta la nggit ngikutken pemindon seninana e. Iikutkenna pemindon seninana e alu persyaratén, adi menang pagi ia i bas peperangan, e maka ia pagi jadi peminpin bangsa Israel. Iueken seninana pemindonna e. Ipasu-pasu Tuhan Jepta ras bangsa Israel, menang ia naluken bangsa Amon. E maka iangkat Jepta jadi peminpin i tengah-tengah bangsa Israel.

Jepta enggo berhasil jadi peminpin i negeri Top, tapi guna mbela bangsana nggit ia mulih ku Gileat. Erperang ras naluken bangsa Amon. Radu ras ia erjuang ras senina seninana. La teridah atena nembéh man seninana, ras ipekenana bangsana. Jiwa nasionalis lit i bas Jepta, guna bela negara itadingkenna kedudukan si enggo sikap i negeri Top. Jiwa nasionalis enda perlu lalap isuanken man anak ras kempu-kemputa.

➤ Kuta ingan pusung ndabuh, tetapléh pertahankén